

鐵嶺縣志

卷十



鐵嶺縣志卷十

人物志

錯節盤根乃徵利器深山大澤必產龍蛇艱難困阨磨礪豪傑之機毓
秀鍾靈生產英賢之地白山黑水之鄉寧同闕里鐵嶺銀岡之秀不乏
聞人或名賢流寓雪泥過去留痕或鄉宦懋勛志乘因之生色其他高
人韻士之儀型足以千古嫠婦村夫之節孝特具一長或經旌表或受
褒揚其窮鄉僻壤湮沒不彰者無論已見聞失實慨文獻之無徵採輯
難周恐魯魚之有誤僅就耳目所及彙爲一卷析爲若干目分類列之
志人物

鐵嶺縣志卷十

人物

名宦

秦漢之世本境始入版圖秦設遼東郡漢置四郡於遼東本境屬樂浪郡守土備邊雖有官吏而其人亦不可考僅自金以後有書可稽必擇其有建設或有政績者方足當名宦之稱茲就歷代之官斯土者節錄如左

按以下文中如咸平咸州雙州銀州興州懿州銅山中固信州皆在本境詳見地理卷建置沿革門

金

安帝六代孫婆盧火之子善騎射大定初除咸平尹後從征有功改爲呼爾哈節度使卒烏哲庫性聰敏有力智善用軍常出敵之不意以寡敵衆所往輒克號爲鶻軍云

王伯龍

瀋州雙城人遼末聚黨爲盜天輔二年率衆二萬及其輜重來歸授世襲明安知銀州兼知雙州後累立戰功五年授節度使充徐宿邳三路軍馬都統敗高拖山之衆十五萬餘於清河改河中尹徙益都尹封廣平郡王卒年六十五正隆間贈宣國公

布薩歡塔

原作僕
散渾坦

扶餘路嘉門人勇健善射遷利涉軍節度使改咸平尹世宗朝轉廣
寧尹與圖克坦克寧敗幹罕於長樂改臨潢尹賊平改海蘭路兵馬
都總管利涉軍節度使以金紫光祿大夫致仕歡塔沉厚有識明於
聽斷所至有政聲

高松

澄州析木人弱冠從軍多力善戰累官咸平府總管判官世宗時充
管押東京路渤海萬戶兵部尙書克實反前同知延安尹李老僧欲
得松共事以言挑之曰君有功舊人至今不得大官何也松曰我一
縣令每念聖恩愧無以報敢他望乎老僧遂不敢言克實事敗松從
幹罕以力遷咸平少尹官至崇義軍節度使

諾延溫都烏達

阿卜薩水人通書史工詩世宗朝授咸平及會寧尹爲北邊行軍都
統治尙寬簡多備禦謹斥埃邊境以安改爲北京留守以廉察舉所
在有能名無私過入拜參知政事

伊喇子敬

字同文遼五院人皇統間興修遼史除同知遼州事舊本廳自有佔
地歲入數百貫子敬曰已有公田何更取民田竟不取累遷簽書樞
密院事同修國史及爲興州尹女自懿州來謁遇盜剽行李且盡旣
而還之曰我輩初不知爲府尹家人尹有德於民尙忍侵犯耶後歷
咸平廣寧尹致仕卒時家無餘資

承暉

字維明淹貫經史遷東京咸平路提刑副使同知上京留守豪猾屏
息遷臨海軍節度使歷利涉遼海軍遷北京路提刑歷知咸平府臨
潢府爲北京留守卒爲名臣死中都難贈尙書令廣平郡王諡忠肅
張行信

字信甫純正眞率不事修飾擢進士官銅山令明昌元年以廉擢監
察御史兩登相位言無隱避及卒皆曰正人亡矣

梁持勝

附

費摩薩布 韓公恕

勝字經甫稽山人保大軍節度使襄之子多力善射太和六年進士
復中宏詞累官太常博士遷咸平路宣撫司經歷初宣撫使布希萬

金嶺縣志
努有異志欲棄咸平持勝沮之萬努怒杖之走上京告行省太平時
太平已與萬努通謀焚毀上京奪元帥承充軍持勝與提控咸平治
中費摩薩布萬戶韓公恕約殺太平復推承充行省事告發萬努事
泄被害贈勝忠順大夫韓州刺史薩布鎮國上將軍咸德軍刺史恕
明威將軍信州刺史

元

耶律留哥

契丹人初仕金爲北邊千戶太祖起兵朔方金人疑遼遺民有他志
令遼民一戶以二女眞戶妨之留哥不自安遁至隆安韓州與耶的
約合兵十餘萬稱王改元元統盡有遼東諸郡都咸平後與子薛閣

奉金幣銀牌見帝帝大悅賜金虎符仍命爲遼王居廣寧卒年五十
六妻姚里氏入奏會帝征西域承制以氏佩虎符領其衆七年

明

李承勛

湖北嘉魚人正德中以右副都御史巡撫遼東時邊備久弛開原尤
甚士馬纔十二牆堡墩臺傾圯殆盡將士依城塹自守承勛疏請修
築會世宗立發帑銀四十餘萬承勛命步將四人各一軍守要害身
負菴鍤先士卒凡爲城塹各九萬一千四百餘丈墩堡百八十有二
招逋逃三千二百人開屯田千五百頃又城中固

在本境北

鐵嶺蒲河撫順

邊防甚固又敗陳軍民利病咸報可清

胡藥嬰

直隸贊皇人康熙三年初設縣治公爲首任知縣時全境民戶甚少
惟駐防旗籍壯丁千餘家公廣事招徠代籌生計始有繁盛氣象鐵
嶺民籍實創於公

賈宏文

直隸延慶人康熙十四年任縣事提倡文教士始向學又聘董國祥
創修縣志即舊縣志也

許志進

江蘇淮安人康熙三十五年蒞任先是郝中山先生浴謫戍鐵嶺講
學於所居之銀岡書院僅設先師及四配十哲兩廡諸賢總木主於

堂未及議建學宮至是始建於東南隅規模備具文教日昌

焦獻猷

附

宋一驤

崇獻猷康熙四十九年任縣事先是郝公浴以遺宅留作銀岡書院後
爲旗兵佔據公蒞任因邑庠生徐元弼之請據理力爭極力清釐請
於極峯時郝公子林爲奉天府尹輾轉數四宋令一驤繼之始克就
緒將遺宅退出仍作書院故邑之士人欽祀郝並公之子林而於兩
賢令尹之功尤不敢忘云

何師曾
通州人與獻猷同時任儒學訓導重修書院

三寶

京旗人乾隆四十六年任縣事承旨重修縣城詳見地理卷城池門

永福

奉天旗人乾隆四十六年任路記防禦與知縣三寶重修城工

札郎阿

京旗人嘉慶間任縣事時學憲茹奏准頒行庫書於各學署諭州縣建閣以崇之適重修文廟公乃提倡與邑紳等鳩工建尊經閣於文廟東院並建奎星樓於城東南角

崇光

字耀軒京旗人道光間任縣事折獄如神民無冤枉刻聯於頭門文云有一刻工夫且勤爾業無十分委屈莫入吾門至民國改造縣署

始撤去其聯

李應紫

字秀峰甘肅皋蘭縣人進士光緒年間前後兩任縣事慈惠教民案

無冤獄

劉玉林

字崑圃直隸武清舉人同治初連任儒學多年設帳授學門多桃李

提倡書院主齋課實行月試捐廉獎掖光緒間重遊泮水

鹿名世

字景充定興舉人任儒學訓導主書院齋課有捐存書籍於書院

楊昌瀚

字海琴四川拔貢光緒二十五年任縣事明年六月拳匪肇亂延及商民公獨斥爲邪妄匪勢張甚力不如心因去職邑人至今猶惜之
民國

陳 藝

字漱六江蘇宜興縣人民國元年任縣事國體初更萑符甫靖又值百政維新諸端待舉曰警曰學曰自治所有一切建設經營擘劃多由公一人創其始歷六年始去邑人借寇不得至今思之因建德政碑於龍首山之俱樂部園中碑見古蹟卷

李濟東

字泮溪鳳城縣人民國十五年蒞縣事在職二年廉潔自持赴鄉巡

視自備川資秋毫無擾問民疾苦不憚勤勞經營擘劃意欲有所設施未幾去職有志未逮邑人惜之